

## 3. gr.

14. grein reglugerðarinnar orðist þannig:

Hvert skip, sem leggst við bryggju eða að skipi, sem liggur við bryggju lendingarsjóðs, skal greiða fyrir það gjald sem hér segir:

- a. Öll aðkomuskip, 15 rúmlestir eða stærri, greiði kr. 0.60 af nettórúmlest.
- b. Aðkomubátar undir 15 rúmlestum greiði kr. 10.00.
- c. Bátar heimilisfastir á Breiðdalsvík greiði kr. 5.00 af brúttósmálest á ári, þó aldrei undir kr. 100.00. Bryggjugjald reiknast fyrir hverjar 24 klst. eða brot úr þeim.

## 4. gr.

18. grein reglugerðarinnar orðist þannig:

Þegar lokið er affermingu eða fermingu, skal farmeigandi eða skipseigandi láta ræsta bryggju eða hafnarbakka sem notuð hafa verið. Farist það fyrir skal hafnarstjóri eða eftirlitsmaður sjá um að það sé gert, en farmeigandi eða skipseigandi greiða allan kostnað, sem af því leiðir.

Þeir sem skemma bryggjur, hafnarmannvirki eða önnur áhöld, eru skyldir til að greiða að fullu kostnað við að lagfæra það.

Reglugerð þessi staðfestist hér með samkvæmt lögum um hafnargerðir og lendingarbætur nr. 29 23. apríl 1946, sbr. lög nr. 41 5. apríl 1948, til að öðlast þegar gildi og birtist til eftirbreytni öllum þeim, sem hlut eiga að máli.

*Samgöngumálaráðuneytið, 26. apríl 1966.*

**Eggert G. Þorsteinsson.**

*Brynjólfur Ingólfsson.*

## REGLUGERÐ

fyrir vatnsveitu Patrekshrepps.

## 1. gr.

Hreppsnefnd Patrekshrepps hefur einkarétt til reksturs vatnsveitu og sölu vatns á því svæði, er hún nær yfir, og getur fullnægt, svo og á Patrekshöfn.

## 2. gr.

Hreppsnefnd fer með yfirstjórn vatnsveitunnar. Hreppsnefnd og sveitarstjóri annast öll framkvæmdastörf, er vatnsveituna varðar, svo og viðhald vatnsveitunnar og umsjá alla. Hreppsnefnd skal heimilt að ráða sérstakan umsjónarmann vatnsveitunnar, er hafi eftirlit með vatnsveitukerfinu og annist öll þau störf í þágu vatnsveitunnar, er henta þykir. Hreppsnefnd getur löggilt sérstaka vatnsvirkja til að annast viðhald og viðauka við vatnsveituna í samráði við hreppsnefnd, og er þeim skylt að fara í öllu eftir þeim reglum, er hreppsnefnd setur þar um.

## 3. gr.

Reikningsár vatnsveitunnar er almanaksárið, og annast sveitarstjóri reikningshaldið, innheimtu og greiðslur. Reikningar vatnsveitunnar skulu endurskoðaðir af endurskoðendum hreppsreikninga og fylgja hreppsreikningum ár hvert.

## 4. gr.

Hreppsnefnd lætur leggja vatnsæðar svo víða um kauptúnið, sem fært þykir og þörf krefur, svo að húseigendur eigi greiðan aðgang að þeim við veg, götu eða annað almenningsvæði, er lóðir þeirra liggja að eða eru í námunda við.

Vatnsveitan skal sjá um viðhald og endurbætur á stofnæðum hinna eldri vatnsveitna, sem tengdar hafa verið við vatnsæðar vatnsveitu hreppsins.

## 5. gr.

Hver sá, sem komast vill í samband við vatnsveitu Patrekshrepps, skal senda hreppsnefnd umsókn þar um. Umsóknin skal vera skrifleg og henni skulu fylgja upplýsingar um áætlaða vatnsnotkun og til hvers vatn skuli notað.

## 6. gr.

Enginn má leggja vatnsæðar frá vatnsæðum vatnsveitunnar, nema að fengnu leyfi hreppsnefndar og eftir fyrirmælum hennar, bæði um efni og tilhögun verksins. Hverjum húseiganda ber að greiða allan kostnað við lagningu vatnsæða frá aðalæð í hús sín og annast viðhald þeirra.

## 7. gr.

Skylt er hverjum húseiganda, er vatnsæð hefur, að halda vatnsæðum sínum vel við og láta tafarlaust gera við þær, ef leki kemur að þeim. Hann skal sérstaklega gæta þess, að ekki frjósi í æðunum.

Enginn má eyða vatni að óþörfu.

## 8. gr.

Hreppsnefnd, umsjónarmanni og löggiltum vatnsvirkjum er heimilt að fara um hús manna, þar sem vatnsæðar liggja, til þess að athuga þær og tæki þau, er sett eru í samband við þær. Ef þeim þykir útbúnaði í einhverju ábótavant, skal tafarlaust bætt úr því á kostnað eiganda.

## 9. gr.

Heimilt er hreppsnefnd að loka vatnsæðum fyrir þeim, sem vanrækja að láta gera við bilanir á pípum eða tækjum, eyða vatni að óþörfu eða greiða ekki vatnsskatt á réttum gjalddaga. Fullan vatnsskatt ber einnig að greiða fyrir þann tíma, sem vatnsæðar eru lokaðar af þessum sökum. Hreppsnefnd getur fyrirskipað takmörkun á vatnsnotkun, sé skortur á vatni. Þá getur hún og lokað fyrir vatnið, þegar þörf krefur, vegna hreinsunar eða annarra framkvæmda við vatnsveituna, enda skal það tilkynnt áður, sé þess nokkur kostur.

## 10. gr.

Skylt er hverjum manni að láta af hendi land og landafnot í þarfir vatnsveitunnar, svo og mannvirki, ef rök mæla með því, og þola þær eignakvaðir, óhagræði og takmarkanir á afnotarétti, sem vatnsveitan kann að hafa í för með sér, sé ekki önnur úrlausn fyrir hendi, enda komi fullar bætur fyrir samkvæmt mati, ef ekki næst samkomulag.

## 11. gr.

Af öllum húsum á vatnsveitusvæðinu, sem metin eru til fasteignamats, og tengd eru vatnsveitu hreppsins, skal greiða vatnsskatt, er nemi  $1\frac{1}{2}\%$  af fasteignamatsverði árlega, þó þannig, að lægsta gjald af íbúð skal vera kr. 300.00 — þrjú hundruð krónur. Af gripahúsum, beitingaskúrum og slíkum húsum skal lægsta gjald vera kr. 100.00 — eitt hundruð krónur.

## 12. gr.

Af húsum þeim, sem nota mikið vatn til annarra þarfa en heimilisnotkunar, svo sem hraðfrystihús, fiskverkunarstöðvar, verksmiðjur, þvottahús, iðnaðarfyrirtæki, gistihús o. s. frv. skal greiða 3% af fasteignamatsverði húsanna, ef vatn er ekki selt eftir mæli skv. 13. gr.

## 13. gr.

Hreppsnefnd er heimilt að setja upp vatnsmæla hjá þeim fyrirtækjum eða einstaklingum, sem nota mikið vatn, og skal þá greiða kr. 1.00 fyrir hverja smálest upp að 1000 smálestum, en kr. 0.50 fyrir hverja smálest, sem umfram er.

## 14. gr.

Sé vatn ekki selt eftir mæli samkvæmt 13. gr., er heimilt að innheimta auka-vatnsskatt svo sem hér segir: Af hverri tunnu uppsaltaðrar sildar kr. 0.75, af hverju máli (sild), sem lagt er upp til bræðslu, kr. 0.30, af hverri smálest af frystum landbúnaðar- og sjávarafurðum, kr. 10.00, af hverri smálest af saltfiski og skreið, kr. 10.00, af hverri kind, sem slátrað er, kr. 0.30, af hverjum stórgrip, sem slátrað er, kr. 0.50.

## 15. gr.

Ef vatn er selt til skipa, skal söluverð vera kr. 15.00 — fimmtán krónur — fyrir hverja smálest, en minnsta gjald skal þó vera kr. 50.00 — fimmtíu krónur — fyrir fiskiskip, en kr. 100.00 — eitt hundrað krónur — fyrir önnur skip. Þá er hreppsnefnd heimilt að ákveða, að hafnarsjóður Patreksahrepps greiði vatnsveitunni eftir mæli eða ákveðna upphæð á ári í vatnsskatt eftir nánari ákvörðun hreppsnefndar, enda hafi höfnin allar tekjur af vatnssölu þeirri, er fram fer við höfnina, að undanskyldum framleiðslugjöldum sjávarafurða.

## 16. gr.

Skip, sem vatnsveitan hefur afhent vatn, má ekki, að viðlögðum sektum, fara af höfninni fyrr en vatnið er greitt, nema gjaldfrestur hafi verið veittur.

## 17. gr.

Af öllum bifreiðum í hreppnum skal greiða vatnsskatt, er nemi kr. 150.00 — eitt hundrað og fimmtíu krónum — af vörubifreiðum, en kr. 100.00 — eitt hundrað krónum — af fólksbifreiðum og smærri bifreiðum.

## 18. gr.

Gjöld samkvæmt reglugerð þessari getur hreppsnefnd hækkað eða lækkað um allt að 50% — fimmtíu af hundraði —, bæði einstaka liði og í heild, án staðfestingar ráðuneytisins.

## 19. gr.

Gjaldár vatnsveitunnar er almanaksárið. Gjaldddagi vatnsskatts er 1. júlí ár hvert og greiðist vatnsskatturinn í einu lagi fyrir liðið ár. Vatnsskattur samkvæmt 14. gr. fellur í gjalddaga um leið og varan er framleidd eða flutt á skipsfjölg til útflutnings.

Húseigandi ber ábyrgð á greiðslu vatnsskatts, sem má taka lög taki, og einnig er hann tryggður með lögveði í húseigninni næstu tvö ár eftir gjalddaga með forgangsveði fyrir hvers konar sammingsveði og aðfararveði, án tillits til eigendaskipta.

## 20. gr.

Bannað er að taka vatn úr brunahönum vatnsveitunnar eða setja hreyfivélar í samband við hana, nema með leyfi hreppsnefndar eða þess aðila, sem hreppsnefnd hefur falið slökkvistarf í kaupþúninu.

## 21. gr.

Brot á reglugerð þessari varða sektum allt að 2000 krónum, nema þyngri refsing liggi við að lögum. Sektarfé rennur í sveitarsjóð. Valdi nokkur skemmdum á vatnsveitukerfinu, skal hann bæta það eftir mati tveggja óvilhallra manna.

Mál út af brotum á reglugerð þessari skal farið með að hætti opinberra mála.

Reglugerð þessi, sem hreppsnefnd Patreksahrepps hefur samið og samþykkt, staðfestist hér með samkvæmt vatnalögum nr. 15 20. júní 1923, sbr. lög nr. 93 5. júní 1947, um aðstoð til vatnsveitna, til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Jafnframt er úr gildi felld reglugerð fyrir vatnsveitu Patreksahrepps, nr. 153 26. ágúst 1953 og breyting á þeirri reglugerð nr. 135/1958.

*Félagsmálaráðuneytið, 26. apríl 1966.*

F. h. r.

**Hjálmar Vilhjálmsson.**

*Hallgrímur Dalberg.*

## S A M Þ Y K K T

fyrir Veiðifélag Fljótsdalshéraðs.

1. Félagið heitir veiðifélag Fljótsdalshéraðs.

Heimili þess og varnarþing er sama og formanns þess á hverjum tíma.

2. Félagið nær til allra jarða, sem land eiga að Lagarfljóti og Jökulsá og þverám þeirra, en þær eru:

**Hjaltastaðahreppur:**

Tjarnarland, Stóra Steinsvað, Ekra, Dratthalastaðir, Hóll, Hólshjáleiga, Víðastaðir, Sandur.

**Eiðahreppur:**

Uppsalir, Finnstaðir I, Finnstaðir II, Fossgerði, Mýnes, Breiðavað, Fljótsbakki, Snjóholt, Eiðar, Gröf, Eiðahreppur.

**Tunguhreppur:**

Blöndugerði, Stóri Bakki, Árbakki, Litli Bakki, Hallfreðarstaðir, Hallfreðarstaðahjáleiga, Hrærekslækur, Galtarstaðir ytri, Galtarstaðir fremri, Húsey, Geirastaðir, Nefbjarnarstaðir, Gunnhildargerði, Kirkjubær, Kleppjárnsstaðir, Brekka, Lindarhóll, Litla Steinsvað, Straumur, Heykollsstaðir, Vífilsstaðir, Vífilsnes, Dagverðargerði, Rangá I, Rangá II, Bót, Flúðir, Skóghlíð, Heiðarsel, Brekkusel, Fremrasel.

**Hlíðarhreppur:**

Eyjasel, Hólmatunga, Torfastaðir, Árteigur, Hnithjörg, Fagrahlíð, Hlíðarhús, Sleðbrjótssel, Grófarsel, Másel, Sleðbrjót, Breiðamörk, Surtssstaðir, Hallgeirsstaðir, Hrafnabjörg, Fossvellir.